

Xlimactuy xcarta tū tzoklī San Juan

XATAPAJMUJUN TACHIHUIN:

Yumá xlimactuy xcarta San Juan nā huá lichihuínán xlipacs huantū chunatiyá liaksaninankoy xtachihuín Dios, xahuá tánuj talacapastacni. Huantī tzoklī yumá carta limapacuhicán “kolutzín”, chū yumá kolutzín litakalhchihuínankoy xlipacs huantī lipahuankoy Cristo laquimpi nī cacanjalanikolh xlipacs yama huantī huankoy pī Jesucristo nī huá xaxlicānā tī xlimínat xuanit. Hasta huanikoy natalanín pī nī camalacquiñikolh c-xhiccán huantī chuná liaksaninantlahuankoy yumá talacapastacni. Xtachuná lantla xapulh carta huantū tzoklī San Juan, nā chunatiyá litakalhchihuínankoy pī acxtum calapaxquiñikolh chatunu amakapitzín.

Huantū akstītum, chū lacatītum calapaxquiñu chatunu amakapitzín

¹Quit kolutzín Juan, luhua canā lipaxuhu ccatzoknimán yumá quincarta xlipacs huixín huantī calacsactasaninítan Dios, chū macxtum litamacxtupiyátit xtachihuín Dios c-mincachiquincán. Ccāhuaniputunán pī quit luhua ccapaxquiýán, chū nī caj xman quit ccapaxquiýán huata nā capaxquiýán xlipacs yamá huantī unú c-quilakstipán nā aya lakapaskonit xtaluloktat Dios. ²Quin nā cpaxquiýán la quilnatalán sampi xtaluloktat Dios huantū kalhiyahu c-quinacucán caxanilihuayaj xtihua quincatalamán nahuán. ³Quit clacasquin pī Quintlatican Dios, xahuá Quimpuchinacan Jesucristo cacāmaktakalhnī, chū xataxajñī cacalīsiculanatlauán tlan, chū lipaxuhu latámat, chū cacamaxquín xtalacapastacni laquimpi lipaxuhu, chū xlipacs minacucán

nalapaxquiýátit, huampi lacatītum chuná lantla camininiyán.

⁴Quit luhua canā clipaxuhuanit sampi ckaxmatnit pī makapitzín huantī lacxtum catatamacxtumiyán, xlacán luhua akstītum lamakó xtachuná lantla limapaksinanit Quintlatican Dios nalatamayahu. ⁵Koxutanín huixín natalanín, huá xpalacata quit ccalimālacapastacayán miliputumcán pī huantū akstītum calatamahū, chū lacatītum calapaxquiñu chatunu amakapitzín. Xlipacs yumá huantū ccatzoknanimán, nī napuhuanátit pala xasasti limapaksín, huatiyá yumá limapaksín huantū hasta xakasiya quinticamaxquín Jesús. ⁶Cumu pala xlicānā quin makcatziyahu pī paxquiýahu Dios, pus nā luhua quincamininiyán pī lihuana namakantaxtiyahu c-quilatamatcán xlimapaksín, xtachuná la hasta acxnī xakasiya kaxpatnitántit pī akstītum calilatamahū xtapáxquit.

**Juan huanikoy pì nítú
catiaskahuimikolh aksaninanín**

⁷Luhua cuíntaj catlahuátit sampi luhua lhuhua lapulakoy aksaninanín huanti lakmakankoy, lixcájnít líkálhchihuínankoy, chu nì canajlaputunkoy pì Quimpuchinacan Jesús xlicana chixcú tihua, chu quílatamachí catuxáhuat xtachuná la catihua chixcú. Xlipacs huanti nì chuná masiyukoy, pacs caj aksahuiminanín, chu caj talatlahuaputunkoy Cristo.

⁸Cana huixín, luhua camininiyán cuíntaj natlahuayátit laquimpì nítú nacalíakskahuipicanátit huantu xlacán huankoy, chu nì namakatzankayátit xtaskahu mintascujutcán huantu aya tlahuanitántit, huata quit clacasquín pì acxtum namakamaklhtinánátit pacs mintatlajacán huantu Dios camalacnüninitán nacamaxquiyán.

⁹Xlipacs yamá huanti masiyumakó huantu nialh huá xtalacapastacni Jesús, huanti nì chuná lama, nì xlicana talama c-xlatamat Dios, huampi huanti akstítum lilatamay huantu Jesucristo masiyunít, xlicana lacxtum talama quintlätican Dios, xahuá Quimpuchinacan Jesucristo. ¹⁰Lapi huí ti nacalakanachán c-minchiccán,

chu nacalítakalhchihuínamputunán tánuj talacapastacni nì xahua huantu masiyunít Jesús, quit ccahuaniyán pì nì camakamaklhtinankótít, chu nì cakaxpatnikótít huantu nacahuiniputunán, hasta nì pala mininiy namacatiyakoyátit.

¹¹Sampi caxaticahuá huanti aya catziy huantu xlacán huankoy, chu chunacú lipaxuhu macatiyakoy, chu tatamacxtumikoy, quitaxtuy pì talicatziy huantu xlá liakskahuinantlahuán lixcajnit xtascújut.

**Ahuatá huantu xakatlílacankoy
natalanín Juan**

¹²Natalanín, lhuhua ckalhiy tachihuín huantu ccalítakalhchihuínamputunán, huampi nialh ccatzoknaniputunán, huata xatlán cpuhuán, lapí Dios lacasquín, nì pala makas quilhtamacú naccalakanachán laquimpì man lacatzaj naccatalaxakatliyan, chu acxtum nakalhiyahu tapaxuhuán.

¹³Xlipacs natalanín huanti na Dios lacsackonít sampi macxtum lítamacxtumikoy xtachihuín, huanti unú huilakó luhua lipaxuhu caxakatlíla canachán.